

Om Moo iss immer was los

Om Sunndaach vorm Friehschoppe hawwe merr unne om Moo gestonne unn hawwe de Ende zugeguckt. Weil doo war e End mett acht Junge, dess hott so lusedich ausgeseh wie die Junge alls um die Alt erumgeschwumme sinn. Doo sacht de Schorsch: Die sinn jetz groß genuch, die werrn nimmi von de Rawe geholt, awwer letzt Woch warns noch zeh Kloone gewese. No ja, e bisje Schwund gibts immer.

Moont de Karl: Weil de Schorsch grad Schwund gesacht hott: Habder eich eichtlich vorne om Bootshaus emol die Uferwänd oogeguckt?

Ich frooch: Ei was issen mett dene, Karl?

De Karl schnappt uns om Ärmel unn zieht uns bis vors Bootshaus: Dess missder eich emol oogucke. Om beste gehn merr uff die Ruderpritsch.

Mir gehn uff die Pritsch unn de Karl zeicht mettem Finger: Guckt emol – doo iss die Wond kaputt und doo unn doo vorne aach. Die Stoo sinn erausgeschwemmt unn aach de Betong.

Josses naa, habb ich gesacht, hott dess noch kooner geseh? Doo siehsde joo de blonde Sond! Dess dauert nit long, dann breche die Welle noch mehr Stoo eraus. Die sinn joo schunn gonz los!

Nochemol zeicht de Karl uff so e Stell: De Sond iss unnerwühlt unn wissder von wem? Von de Radde! Je greeßer die Lescher je mehr Radde baue sich doodrin Nester unn ziehn Junge groß. Koo Wunner, dass immer mehr von dem Viehzeich doo erummacht.

De Schorsch schittelt nor de Kopp: Saacht emol, sinn mir die oonziche die so ebbes seh odder sehns aach onnern unn es iss koo Geld doo dess ze repariern?

Mir hawwe die Achsele gezuckt unn sinn widder e Stick uff de Herrsch zugonge, doo bleibt de Schorsch uff oomol steh: Du Honnes, du host dich doch vorsjohr iwwers Strondbad lusedich gemacht unn jetzt werrds gebaut. Was saachsden dezu?

No ja, habb ich zur Antwort gewwe, ich habb mich iwwer e Strondbad - dess hott sich nooch Bade im Moo oogeheert - unn enn englische Nome deferr uffgereecht. Jetz awwer gibts e Luft- unn Sonnebad unn heeßt Flörsheimer Strand, unn ich muss saache, so wies jetzt gemacht werdd gefällt merr.

Ei ja, moont de Karl, wenn dann noch de Summer iwwer so e Wedder iss wie die letzde Daache, dann gibts dort aach Betrieb. No ja, wenn die Stadt dort e bisje Rebbach mecht, dann kennese vielleicht aach die Löcher doo vorne zumache.

Ich habb gegrinst: Om Flerschemer Strond soll joo aach Beach-Volleyball gespilt werrn. Wenn doo emol die Mädcher spille! Dess habb ich im Fernseh geseh – Dunnerwedder, die hawwe villeicht Sexy-Trikos oo! Doo kenne merr allsemol hiegeh unn gucke.

De Karl schittelt de Kopp: Wie wolle merr dess dann mache? Mir Alte kenne uns doch nit on de Zaun stelle unn alls doo enoi gucke.

De Schorsch hott iwwer alle Backe gegrinst: Ich kann doohie. Weil unser Enkelche, die Anna-Lena, die grad sechzeh worrn iss, ab unn zu dort spille dut.

De Karl hott de Schorsch gestummt: Du host aach alle Glick.

Heert emol, habb ich gesacht, ich habb e Idee: Mir drei mache enn Anna-Lena-Fanclub uff unn dun die unn ihr Monnschaft kräfdisch unnerstitze. Doo kann doch kooner was degeeche hawwe wenn mir dann dort hiegeh, odder?

De Karl schittelt de Kopp: Kooner nit – awwer moi Paula.

Eiern Honnes